



ШЫН

НИИТИЛЕЛ-ПОЛИТИКТИГ СОЛУН

1925 чылдың
август 31-де
үнүп эгелээн

№ 106 (16716)

2003 чылдың
АВГУСТ 21,
четверг

Ат салган шагы 19.00
Садар өртгээ 3 рубль.

Чазак Даргазының ажил-албаны

ХАРЫЛЗААНЫ КАТАП ТУРГУЗАР

Август 18-те ТР-ниң Чазак Даргазы Ш.Д.Ооржак Красноярскиде "Тудуг механизация" ажык акционер ниитилелиниң чингине директорунун оралакчызы Н.М.Хряпко-биле ужурашкан.

Шаг-төөгүден бээр сурагжаан "Тудуг механизациязы" ААН-биле кады ажилдажылганың түннелдерин чугаалажыры-биле аалдап келгенин аалчы дыңнаткан. "Тудуг механизациязының" УМ-18 деп салбыры Кызылга бактаап, чаа Шагаан-Арыгны тударынга эки киришкенин ол дыңнаткан.

Тывага байырлалдар бооп турар хүннерде биске келген аалчы республика тудугжуларының бергедеп турар айтырыгларын шийтпирлээринге дуза кадарын дыңнаткан. Биске кел-

ген аалчы хамааты тудугларны дүргедедиринге, Хову-Аксында кобальт бүдүрүлгезин катап тургузарынга дузалап болурун дыңнаткан.

Ш.Д.Ооржак харылзааларны катап тургузар күзелин, кады ажилдажылганы тургузарының аргаларын аалчыга дыңнаткан.

Сөөлгү чылдарда республикада тудуг ажылының калбарганын, ылаңгыя РФ-тиң Президентизи В.Путинниң келир чылын Тывага болур юбилейлер дугайында Чарлыы үнгенинге холбаштыр Тывага-тудуг херээ улам улуг хемчээлге калбарар дээрзин сагындырган. Келир үеде Тывага тудуглар талазы-биле тендер садыглаашкынынга идепкейлик киржиринче Красноярскиниң тудугжуларын Ш.Ооржак чалаан.

Бистиң тускай корр.

ТР-ниң Чазаанда

ЮБИЛЕЙГЕ БЕЛЕТКЕЛ ЭГЕЛЭЭН

Тыва Республиканың Чазааның ээлчеглиг хуралы август 19-та болуп эрткен. Республика амыдыралынга ужур-дузалыг чээрби бир айтырыгны аңаа чугаалашкан.

Россия Федерациязының составында Тыва Республиканың бактаап киргениниң 60 чылын болгаш Кызыл хоорайның тургустунганының 90 чылын байырлаар дугайында Россия Федерациязының Президентизи В.В.Путинниң Чарлыын амыдыралга боттандырар талазы-биле хемчеглер ажилдап кылыр организастыг комитеттиң болгаш ажилчын бөлүктөрүнүн составының дугайында айтырыгны Чазак хуралыга чугаалашкан. Хемчеглер ажилдап кылыр оргкомитеттиң составында Чазак кежигүннери, ТР-ниң Улуг Хуралының ийи палатазының удурткучулары болгаш өске-даа харысалгалыг ажилдакчылар кирип турар. Организастыг комитетти ТР-ниң Чазак Даргазы Ш.Д.Ооржак удуртур. Он алды ажилчын бөлүктү тургускан.

Россия Федерациязының составында Тыва Республиканың бактаап киргениниң 60 чылының байырлалы 2004 чылда болур. Бо болушкунунун төөгүлүг, политиктиг болгаш культурлуг ужурдузанын барымдаалааш, РФ-тиң Президентизи ук байырлалды федералдыг деннелге демдегелеп эрттирерин Чарлыында айткан. Ынчангаш Чазак бо чугула

юбилейге белеткелди бүгү талазы-биле хынамчалыг чорудары-биле оргкомитетти тургускан.

Тыва Республиканың аграр лицейин тургузар дугайында айтырыгны Чазак кежигүннери сайгарып көргөн. Тыва Республиканың Чазак Даргазының сонгулдаларының кампаниязының үезинде Шериг-оол Дизи-жиковичиге Сукпак суурнун сонгукчулары мурнунда турган "Рассвет" совхозтуң баазазынга республиканың аграр школазын ажыдар дугайында чагыгны берген. Оон улуг ужур-дузанын барымдаалааш, ону күүседирин чагыглар хемчеглеринде кириген. Амгы үеде чаа өөредилге черин ажыдар мурнунда турган совхозтуң администрация бажынын эде дерири болгаш өске-даа ажилдар ында кидин түлүк чоруп турар, чаа өөредилге чылынга чедир доозары көрдүнгөн. Чаа өөредилге чылында аңаа Тыва Республиканың аграр лицейин ажыдарын Чазак хуралы шийтпирлээн.

Хүн чурумунда кирген өске-даа айтырыгларны Чазак хуралы чугаалашкаш, чогуур доктаалдарны хүлээп алган.

Бистиң корр.

БЕДИК ШАҢНАЛ-БИЛЕ

Тыва Республиканың Чазак Даргазы Ш.Д.Ооржактың 2003 чылдың август 12-де №359 Чарлыын езугаар республикага спортту сайзырадырынга эки ажылы дээш спорттуң болгаш күш-ажылдың хоочуну, Тыва Республика Ордениниң эдилекчизи **Сюр-оол Хургүлекович ОНДАРГА** "Тыва Республиканың Арзылаш мөгези" хүндүлүг атты тывыскаан.

ДУЗАЛАКЧЫ МАЛЧЫН ӨГ-БҮЛЕ



Тыва Республиканың алдарлыг малчыны, алдарлыг тудугжузу Маадыр-оол Лопсанның хонаш-турлаа аал хондурар, мал одарладырынга таарымчалыг черлерде. Мал эезинге кандыг-даа ыяш тудуг-суурга херелгетинер кылдыр ажыглаттынар. Ыгбаннар, чыраалар, калбак-ыяштар, ирик-ле эвес болза, ыяштың бүгү хевирин Маадыр-оол Егорьевич ажыглап турар. Оон күзег-чазаа — Чаа-Хөлдүң Сарыг-Булуңда.

Мал ажылынче киргеш, аныяктар, чоок кижилер болгаш

чуржааттарын амыдыралдың көшкүн малчын омур-хевиринге өөнүн херээжен ээзи Вера Араптановна-биле кады ол ижикирип турар. Күш-ажылдың хоочунунун чылгы малын, хой-өшкүзүн Аяна, Артур карактажып, дузанын бо хүннерде чедирип турар.

— Аяна мээң дунмам-дыр. Күдээм Артур Шойдаа чүгле шээр мал эвес, инектерни безин сааптар. Оларның кайызы-даа малчын уктуг. Мал ажылын эки билир оолдар, кыстар-биле кады мал аразынга чоруурга, бо

кижиге безин чиик болур-дур— деп, Вера Араптановна дузалакчы кадарчыларын мактады.

Аныяк дузалакчылар кады турупканда, чараш-даа, шуут бир баг чорду. Хойлар, хураганнар оларны эезине берген. Олардан дезер туржук, чанынга туруптар, харын-даа эдерер.

Ол чорумал ажылынга Артур биле Аянаның салымныын херечилеп турар.

Васильи БАЛЧИЙ-ООЛДУҢ
чуруу.

Электри энергиязы

КЫЗЫГААРЛАП БЭЭР. ЧҮГЕ?

Буураашкыга таварышкан "Тывакоммунэнерго" күрүнениң каттышкан бүдүрүлгези "Тыва-энерго" ажык акционер ниитилелинге 124 млн.рубльдиң өрезин арттырып каан. Ол өрелерден аңгыда, оон кырынга чаа 5 млн.рубль өре немежил келген, ол хүннүң-не өзүп орат.

Ол өрелерни улгаттырбас сорулга-биле, оон иштинде электри энергиязын мөөнү-биле садып алыр федералдыг рыноктуң мурнунга "Тываэнерго" ААН бо чылдың август 20-ден эгелээш, Сибириниң энергия системазының каттышкан диспетчер эргелелиниң негелдези-биле 1,7 млн.квт.шак электри энергиязының кызыгаарлаашкынын кирир. "Тываэнерго" ААН-ниң удуртулгазының адынга

электри энергиязын бээрин кызыгаарлаарының дугайында телефонограмма доктаамал кээп турар. Эң сөөлгү негелдени август 18-те Сибириниң каттышкан диспетчер эргелелиниң кол инженерни Алексей Работин чоруткан. Ында айтып турары-биле алырга, электри энергиязын кызыгаарлап берип тургаш, шуут өжүрерин болдурбас.

"Тывакоммунэнерго" ККБ-зи РФ-тиң "Буураашкын дугайында" хоойлузун үрөп турар, амгы агар санда өрелерин төлөвейн тургаш, "Тываэнерго" ААН-ниң акшазын "оорлап" ап, боттарының херелгелинге ажыглап турар. "Тываэнерго" ААН өске бүдүрүлгө бүдүрүлгенин акшазын оор езу-биле ажыглап турарына таарзынмайн, айтырыгны

прокуратураның мурнунга тургускан. Устунде турар кол бүдүрүлгениң айтыышкыны-биле "Тываэнерго" ААН албадал-биле электри энергиязын кызыгаарлап бээр ужурга таварышкан.

Электри энергиязының херелгекчилери керээни "Тывакоммунэнерго" ККБ-зи чарган, кандыг-даа айтырыг тургустунуп кээр болза, конкурс эргелекчизи С.М.Сагаан-биле харылзажыр, тел: 3-10-21. Ынчап кээрге "Тываэнерго" ААН-ниң ону харылаар юридиктиг эргези чок. Кымын-биле керээни чарган силер, орта айтырыгны тургузунар.

"Тываэнерго" ААН-нин
парлалга албаны.

Республика хүнү, Наадым национал байырлалдарның каастакчызы, республика чергелиг чараш кыстар мөөрейи «Даңгына-2003» август 17-ге хөгжүм-шии театрынга эрткен. Кожууннарга болган даңгына мөөрейлериниң тиилекчилери 14 киржикчилер тыва кыстарның онзагай шиник чаражын көргүскен.

Мөөрейниң шииткечилери, жюри кежигүннери – Аңгырак Ховалыг, театрның аныяк артизи Эдуард Ондар, КУУ-нуң танцы башкызы Андрей Хомушку, Мөңгүн-Тайга кожуунунуң культура килдизинин ажилдакчызы Ульяна Хертек база Буян Ховалыг, Азиат Монгуш олар хүндүлүг олуттарын ээлептери билек, мөөрейниң башкарыкчызы, республика чергелиг даңгына конкурзунуң тиилекчизи Чойгана Донгак чараш кыстарны сценаже чалапты. Каас-чараш кеттинген киржикчилер залда көрүкчүлөр аразы-биле эртип, мендилежигниң езулалдарын кылдылар. Бөгүнгү мөөрейниң киржикчилери – кожуун чергелиг чараш кыстар конкурзунга шылгарап үнгеннер-дир. Бажы бедик Бай-Тайга, мөңгө харлыг Мөңгүн-Тайга база Тес-Хем, Танды, Улуг-Хем, Өвүр, Сүт-Хөл, Кызыл, Чөөн-Хемчик кожууннарның, Кызыл, Ак-Довурак хоорайларның төлээлери чараш кыстар Тываның кыдыг-кызыгаар, чурумалдыг бойдузунуң өңгүр чечектерин делгээн ышкаш онзагай көстүп, национал байырлалдарга улам шиник аянны кириптилер.

Конкурс аңгы-аңгы иштики мөөрейлерден тургустунган. Баштайгы кезээ — тыва национал костюмнер көрүлдөзү. Амгы үениң аянынга дүүштүр быжып даараан платье, бөрттер, чавага-чинчи, сыргалар кожуун, хоорайлар төлээлериниң бедик чогаадкчы белеткелин херечилеп турар. Ылаңгыя Ак-Довурак, Танды, Бай-Тайга, Сүт-Хөл кожууннарның тиилекчилери тыва кыстың онзагай хевирин салбааннар.

Дараазында таныштырылга соонда болган «Онаалгалар күүселдезинге» мурнакчы хойжу, сарлыкчыларның чурту – Бай-Тайганың төлээзи республиканың малчыннарынга Наадым байырлалы-биле байыр чедирген.

Мөгелер, алдан-маадырлар, салым-чаянныглар ораны Сүт-Хөлдү Суг-Аксының даңгыназы алгап мактаан. Улуг-Хемниң Хайыракан даанга, Тес-Хемге, Чадаананың алды, үстүү хүрээлеринге хамаарышкан чоргааралдың сөстери дыңналган. «Мөңгилерниң даңгыназы» болган Аржаана Дадаа көрүкчүлөргө «Найыралдың начыны» шуулганың дугайында сонуургатты. Кызыл хоорайның төлээлери («Мисс-Кызыл-2003», «Супер-модель-2003») Тываның найысылалы, Азия төвүнүң чараш-каазын таныштырган. Конкурстун эртип турары уран чүүл өргээзи – театрга хамаарышкан бодалдарны Санкт-Петербургтуң тыва студентилер аразынга эрткен даңгына мөөрейиниң тиилекчизи Чечек Монгуш илереткен.



АК-КӨК СҮТ-ХӨЛ КЫЗЫ — «ДАҢГЫНА-2003»



Василий БАЛЧИЙ-ООЛДУҢ чуруктары.



Киржикчилерниң аразындан элээн дуржулгалыын, сценага хостуун аныяк артист Чечек бөгүн база бадыткады-даа.

Уругларның сценага кылаштап билирин, дуртсынының чараш хевирлиин шылгап илередир «Купальниктер» мөөрейинге киржикчи бүрүзү чөөн чүк уран чүүлүнүң аялганың адаа-биле кылашташкан. Ук мөөрейниң организакчылары даңгыналарның кайы хире танцылаарынче, часкы, күскү хептерге модельдер көргүзүп билиринче база кол кичээнгейни угландырган.

Көрүкчүлөргө көрүжүн салбайн баар, мөөрейниң сөөлгү кезээ – кежээки хептер көрүлдөзүнүн соонда кожууннарның төлээлери келген киржикчи бүрүзүңгө девиденчиг

минуталар-даа келген. Жюри кежигүннери белен эвес ажилын төндүрүп, деңзи караан деңнеп түннээри-биле залда олуттарын хостаптылар. Ынчалза-даа арткан ам бир жюри кежигүннери – көрүкчүлөр боттарының шилилгезин кылырлар. Бирги дугаар – Улуг-Хемден 14-кү — Кызыл кожуунунга чедир даңгына бүрүзү кылаштаарга, залда бар адыштар болгаш үннер онаашкан балдарны тодарадып турдулар. Операторнуң тускай дааш-шимээн хемчээр техниказының көргүскени-биле Сүт-Хөлдүн даңгыназы Аржаана Ондар «Көрүкчүлөргө үнелели» номинацияга төлөптүг болган.

Мөөрейлер аразында сценаны ээнзирептээн, «Эдегей» танцы ансамбли

база «Сумеро» танцы бөлүү көрүкчүлөргө чалгаараар чай бербээнер. Вячеслав Донгактың удуртканы танцы ансамбли «Эдегей» бо хүннерде Европа чурттарынынче гастрольдап, оюн-концертин бараалгадыры-биле аъттаныптарлар. Ниитизи-биле даңгыналарны баш бурунгаар белеткеп тургусканы, мөөрейниң бедик денелде эртип турары кол организакчы Вячеслав Донгактың бедик чогаадкчы салым-чаянның бадыткалы болур.

Антракт соонда «Даңгына-2003»-түн оваадаын кедирери-биле «Даңгына-2002» Анна Монгуш хөйүнү манааны жюри-биле сценаже үнүп келди. Бойдустан чаяаттыңан чаражы-биле чараш кыстар ара-

зындан ылгалып үнген киржикчилер аарыкчыларның адыш часкаашкынарнын, культура фондузунун, аныяктар комитединиң база «Орифлейм» косметика фирмазының белектерин алганнар. Ынчангаш 2003 чылдың даңгына мөөрейиниң «Мисс супер-модель» номинациязынга «Мисс Кызыл-2003» – Аэлита Аяк-оол төлөптүг болган. Тандының чараш кызы Елена Сарыглар тыва кыстың каасталга хевиниң онзагайын эгидип, «Национал костюм» дээш шааннаткан. Аңгы-аңгы кожууннарда киржи келген даңгыналарның боттарының шилээни «Мисс Дружба» — Бай-Тайганың төлээзи Айлаң Седен-оол. А «Орифлейм» фирмазы бо кежээниң кол спонсору болуп, шупту жюри кежигүннеринге, организакчы Вячеслав Донгакка тускай белектерни тывыспышаан, Кызыл кожуунун даңгыназы Ояга фирманың мурнундан номинацияны берген. Мөөрейниң «Вице-мисс» бедик шилилгезинге Кызыл хоорайдан Анжела Монгуш төлөптүг болган.

А чараштарның чаражы кым болганыл? Чарлакчы «Даңгына-2003»-түн 11-ги номерин адаптары билек, залды өөрүшкү, шимээн дола берди. Республика чергелиг даңгына мөөрейиниң тиилекчизи – кожуунунга даңгына конкурзунуң тиилекчизи, ак-көк Сүт-Хөл чараш кызы – Аржаана Ондар болган. Аас-кежиктиг Аржаана ТР-ниң Аныяктар херектериниң талазы-биле күрүне комитединиң тывысканы путевка-биле Владивосток хоорайның чанында Бүгүрроссияның уруглар дыштагылыга төвү — «Океанга» бир ай чартык үеде дыштагыры-биле сентябрь айда аъттаныптар. «Даңгына-2003» — Аржаанага байыр чедирбишаан, океан эрииниң агаарына солун, хөглүг дыштанып алырын күзеп каалынар.

Тайгана ОЧУР.

Август 17-де Наадым хүрежинин соонда улаштыр-ла 32 шилиндек мөгелерниң хүрежи эгелээн. Аңаа Моол Арат Республиканың алды төлээзи болгаш Тываның эң шилиндек дээн мөгелери киришкен. Ол дээрже Чаан мөге Аяс Монгуш, хоочун мөгелер Владимир Монгуш, Амир Монгуш, Маадыр Монгуш, Федор Куулар, Сүктөр Шимет, Алексей Хомушка болгаш атсураа билдингир апарган анык мөгелеривис Андрей Хертек, Аяс Ондар, Каң-Демир Куулар, Кайгал-оол Донгак, Омак Кара-Сал, Ай-Демир Монгуш, Аян Сараа, Ким Седен-оол, Аңгыр Куулар олар-дыр. А Моол күрүнеден Авырга мөге, бүгү Моолдун Наадымынга ийи катап чемпионнаан Агбаансамдан Сухбат, Чаан мөге Томиран Бумбаяр, Арзылан мөге Алдансух, күрүне Начыны Амгаланбаатор, Хартыга мөге Эрдэнэ Батбаатор олар-дыр.

Моол Арат Республиканың болгаш Тыва Республиканың чонунун аразында эп-найыралын бадыткаан спортчу маргылдаа-даа эгелээн. Оон мурнунда чылдарда моол мөгелер Тывага ховар кээп турган болза,

чооктан бээр удаа-дараа кээп турар апарганы бо. Ол чүнү айтып турарыл дээрже, ийи чуртун аразында экономика, культурулуг болгаш спортчу харылзааларның улам быжыгып орарының бадыткалы ышкажыл. Делегей чергелиг маргылдааларга бистин Чаан мөгевис Аяс Монгуш биле Моолдун Авырга мөгези Агбаансамдан Сухбат ийи катап ужурашкан. Түннели-биле алырга сан 2:0. Аяс Монгуш ажып турар. А Чаан мөге Бумбаяр-биле Аяс Монгуш мырынай сес удаа душканнар. Сан база-ла 5:3 бооп, Аяс ойнап ап келгенин хүрештин башкарыкчызы чарлаарга, стадион сынмас он сес муң ажыг көрүкчүлөр Чаан мөгевис Аяс Монгушка чоргаарланып, дижиттиг адыш часкап, байыр чедирип турдулар.

Моолдан келген аалчылар Улан-Батор хоорайның аңгы-аңгы спортчу компаниларының спортчулары, тренерлери болуп ажылдап турар болду. Эрдэнэ Батбаатор 24 харлыг, Д.Амгалан-

баатор база-ла 24 харлыг. Чаан мөге Бумбаяр бир спортчу компаниның директорунун оралакчызы эрге-дужаалдыг кижиле болду. Ол 1968 чылда төрүтүнген, 35 харлыг. Агбаансамдан Сухбат тренер башкылап ажылдап турар, ол 1971 чылда төрүтүнген. Аймак Арзыланы Алдансух 26 харлыг спортчу-дур.

Хүрештин баштайгы салынын бетинде 32 мөге шупту девил үндүлөр. Моол болгаш тыва мөгелерниң деви аразында оранчок ылгалдыын канчап эскербес боор. Тыва мөгелер езулуг уjur эдертип, девил турары көскү. Аразында ийи-үш хире чараш девиер мөгелер бар болбайн аан харын, ынчалза-даа хей кези дыка багай девиер-дир. Бо дугайында чугаа хүреш болган

ындыгыл дээрже удурланыкчызы "аштырганым ылап шын" дээрзин айытканының демдээ ол чүве-дир.

Бирги салыгда моол мөгелер онагларын чииги-биле октап алдылар. Аныктар хүрежинге ийи чыл улаштыр чемпионнаан Ким Седен-оолду Моолдун Чаан мөгези Бумбаяр октап кагды. Шыырак мөгелеривистин бирээзи Алик Комбуй-оолду Алдансух октады. Конгаа Начынны Батбаатор, Шолбан Монгушту Сухбат октаан. Ынчалза-даа Ай-

Чыраа-Бажындан Ушпас Кууларны Маадыр Монгуш октаан. Сураглыг хоочун мөге Владимир Кара-Салдың оглу Омак Кара-Сал шыырак дээн мөге Андрей Хертекти октады. Дыка чараш оюнну Сараа Аян көргүскөш,

Россия чемпионнадының мөңгүн медалының эдилекчизи адын бадыткады. Сураглыг мөгевис, моол мөгелерни сүртедир Амир Монгушту Сараа Аян "мельница-лааш", арыг октады. А Кайгал-оол Донгак Данзы-Белек Эрти-

Аян-оолдан мөгелер сестир апаары чугаажок хире. Аяс Ондарны А.Сухбат, Кайгал-оол Донгакты Сараа Аян, Омак Кара-Салды ат-сураглыг мөге Николай Сынан-оолдун оглу Алаш Монгуш, Э.Батбааторну Чаан мөге Бумбаяр октаан.

Сес мөге артканда, Сараа Аянны Алдансух, Аян-оол Ондарны Ай-Демир Монгуш, Алаш Монгушту Аяс Монгуш, Бумбаярны А.Сухбат октаан.

Дөрт мөге артканда, оларның онаглары ийи тыва, ийи моол кылдыр таваржып келген. Ай-Демир Монгушту акызы Аяс Монгуш көдүргөш, салып каан. А Алдансух Авырга мөге Агбаансамдан Сухбатка дүжүп берген, мындыг.

Хүрештин эң дүшкүүрлүг үези-даа келген: ийи мөге арткан. Ол дээрже Моолдун улуг Наадымынга ады үнерге-ле, бүгү чыылган чон тура халчып келгеш уткуур Авырга мөге Агбаансамдан Сухбат биле Тыва Республиканың Наадым байырлалының хүрежинин он ийи дакпыр чемпиону, Чаан мөге, делегей чемпионнадының ийи дакпыр чемпиону, Европаның беш дакпыр чемпиону, Россияның алдарлыг спорт мастери Аяс Монгуш-тур. Бот-боттарын эки билчир бо мөгелер делегей чергелиг маргылдааларга душчуп турган болгаш, кайызы-даа аажок оваарымчалыг болуп, элээн болганда, кээп сегиржил алдылар. Түннелинде Агбаансамдан Сухбат арыг тиилелгени чедип алды. Аяс Монгуш дээш "аарып" турган бүгү Тыва шуут "човууртаан" ыш-каш болду. Ам канчаар, "мөгениң майы кадырык" дижири дег, бирде бирээзи, бирде өскези октап турар шыырак мөгелер-дир. Оларның чараш оюнун көрдүвүс.

Тываның төөгүзүндө база бир уттундурбас болушкун болуп артар хүреш дээрзи чугаажок.

ЧУРУКТАРДА: 18 харга чедир оолдар хүрежинге шүүлген Аңгыр Кууларга шаңналды ТР-ниң Чазак Даргазының оралакчызының хүлээлгезин күүседип турар Ш.В.Кара-оол тывыскап; моол мөгелер девил тур.

АВЫРГА МӨГЕ ШҮҮЛГЕН

санында-ла үнүп-ле турар, а түңнел көзүлбес, мөгелер чараштыр девил албас хевээр артып-ла турар.

Моол мөгелерниң деви дээрже езулуг ыдыктап сагыыр езулал-дыр. Адын адаптарга-ла, маң-биле үнгөш, тук чоогунга кээп девиер, кончук чараш самнай аарак доозар. Доозупкаш безин каш секунда иштинде карактарын шийипкен бодун психология талазы-биле белеткээниг, кезек када дөңмектерин даянып алгаш, тынмай барган дег турар. Таваржып келген удурланыкчызын базарынга бодун шак ынчаар белеткеп алган мөге кайын алзыр ийик. Хүрежинге моол мөгени бичи школачы үезинден белеткеп эгелээр болгаш бо спорттун бар-чок чажыттары оларның мага-бодунда, хандамырында апарган хире. Хүрешке онаан октап алгаш, удурланыкчызы ижин баан чежерин манап алгаш, оон соонда октаан мөге девиер. Чүге



Демир Монгуш моол мөге Батохтохту октап алды. А Аян-оол Ондар Амгаланбааторну иштинден тепкеш, октаан. Педколледжтин тренер башкызы, атсураглыг мөге Аяс Ондар август 16-да аныктар хүрежинге шүүлген Аңгыр Кууларны оранчок бедиди көдүргөш, салып каар болду. База бир шыырак өзүп оран мөгелеривистин бирээзи

нени октады. Ийиги салыгда хоочун мөге Владимир Монгушту онаа оглу Ай-Демир Монгушка таварышкан. Ынчангаш огулуну оруундан чайлап бээр уjurга таварышкан. Бирги салыгда шыырак дээн моол мөгени октаан Аян-оол Ондар бо салыгда эң шыырак мага-боттук Сүктөр Шиметти ылап-ла дүжүрдү. Моон сонгаар

ТЫВАНЫҢ АДЫН КЫМНАР КАМГАЛААНЫЛ?

Август 18-те "Хүреш" стадионунга долгандырыг системасы-биле хүрежир моол болгаш тыва мөгелерниң эң шилиндектеринин хүрежи болур чарлал дыңнааш, чон база катап чыгылып келген. 50 рубль өртектиг билет-биле садып киргеш, солун оюнну четтиклейн манап орган. Дүүн чаа-ла үе-шагында эгелээринге чаңчыга берген чон ийи шакта эгелээр уjurлуг хүреш саадап туруп бээрже, кайгап-харап эгелээн. Саадашкынын чылдагааны киржикчилерниң аттарын адаптарга, ам кээп билдинген. Тываның адын камгалап, моол мөгелер-биле Андрей Хертек, Омак Кара-Сал, Артас Ооржак, Алаш Монгуш олар хүрежир болган. Арктанары ады чаа үнүп оран аныктар -Кара-Кат Кенден, Алексей Соян, Александр Хуурак, Каң-Демир Донгак, Ай-оол Дондук, Хензиг-оол Ондар, Хүреш Сүктөр, Эрес Монгуш, Демир Бадан-оол, Аяс Чамдышлай.

Чыылган чон шыырак мөгелер хүрежи болур деп мөге чарлал кылган силер деп организа-чыларны буруудадып эгелээн. "Улуг-бичи мөгелерниң дөге-

рези долгандырыг хүреш болур дугайында чарлалды дыңнаан, а келбейн барган чылдагаанын бис тайылбырлай албас бис" — деп, бир кижиле микрофонга чарлаан. Чон улам шыжыгып, Аяс Монгушту негеп эгеледи. "Аяс Монгуш каш хонгаш болур кудазынга белеткенип, амы-хуунун херээн чогуруп, Абакан хоорайже чорупкан" деп тайылбыр кылдылар.

Элдеп чүве! Че харын, Аяс Монгуш чөптүг чылдагаанныг-дыр. А өске шыырак мөгелеривис канчап барган? Кижилерниң айтыры-ла бо: "Оода Маадыр бар-дыр бе? Оода Амир биле Чимит база чок бе?" Че харын, улуг мөгелер база шупту чылдагаанныг болган дижик, а дүүн чаа Тываның чоргааралы дижип турганывыс Аяс Ондар, Ай-Демир Монгуш, Аян Сараа, Каң-Демир Куулар, Кайгал-оол Донгак, Аян-оол Ондар, Ким Седен-оол, Алик Комбуй-оол олар кайыл? Шыырак моол мөгелер-биле хүрежип, арга-дуржулга алып уjurлуг турганнар эвес бе?

Кайы хүрешке кымнар киржирин Тываның Хүреш федерациязы тодарадып каан тургу дег.

Кайыын, кандыг аалчылар, спортчулар келирил, оларны канчаар уткуурул, кайы оюнга кириштирил дээрзин база-ла спорткомитет-биле кады тодарадып каан турар болгу дег. Барып-барып ол хире шыырак мөгелер кээрже, шупту чиде халчы бээр-ге, ыракка ыдынчыг, чоокка чованчыг-дыр. Ат-алдарлыг мөгелерге анаа хүндүткел кылдыр безин кээп киржир, оларның оюнун сонуургаар уjurлуг турбурус, шыырак мөгелер-даа, удуртчулардан (спорттун) харысалгалыг даргалар-даа көнгүс чок.

Бо хүрешке эрес-дидими-биле хүрежип, моол мөгелерни октаан Омак Кара-Салга, Андрей Хертекке, Артас Ооржакка, шынап-ла, канчап чоргаарланмас боор. Езулуг эр хейлер!

Долгандырыг оюнун түңнелинде ниитизи-биле 362 салыг соонда, тиилекчи илерээн. Ол дээрже Авырга мөге Агбаансамдан Сухбат-тыр. Ийиги черде Э.Батбаатор, үш дугаарында Бумбаяр, 4-7 дугаар черлерде Андрей Хертек, Артас Ооржак, Алаш Монгуш, Омак Кара-Сал олар болган. Аныктарга ол дээш алдар-мактал!



Тывада хүреш сайзырап турар, аныктарның анаа сонуургалы улуг дээрзи маргыш чок. Ынчалза-даа бо эрткен долгандырыг хүрештен түңнел үндүрери чугула. Организа-чылар микрофонну мөгелерге аян турар азы байыр чедирер дээн эзирик кижилерге безин берип турары мырынай дыка эпчок болган.

Черле ынчаш долгандырыг

хүрештин чүге мындыг байдалга эрткеннге хамаарыштыр тайылбырны солун арнынга ТР-ниң спорт комитетиниң азы Тываның Хүреш федерациязының даргазының кайы-бирээзи бээр уjurлуг.

Светлана БАЛЧЫР.
"Шынын" корр.
Василий БАЛЧИЙ-ООЛДУҢ
тырттырган чуруктары.

